

酒窟花

經過歲月穿堂个老相本
揸等思念，行人目珠仁
跔等兩毛冇仔
一陣一陣打在目眚毛
瞞啊瞞仔，瞞目一笑
一窟一窟窩在面頰卵
囡在嘴角个酒窟花
該係心血入盍娘胎肚，焗出个女兒紅
該係成十個月共心跳，焗出个心頭肉
醺醺个子哀情，苦篤苦篤
攞入風雨洗洗湯湯，定定仔來轉甘

攝一兩片月光，放入胸脯前
影等，面兜兜个兩蕊酒窟花
貼在阿姆个背囊心，笑弛弛仔
叻咕……叻咕……唱起渡子歌
柔情个背帶，毋驚臭奶臊
手挾下捩轉一圈又一圈，含水過冬¹
迗迗過个年輪
堅耐个背帶，毋驚臭尿馱
屎脰下包等一坭又一坭，掖麻掖米²
跔跔跌个志氣，等天光

鹹纖³鹹纖个汗水，又流過歲月穿堂
浸皺阿姆一生人个風霜
于上于下个酒窟花，解開思念
三更半夜，開到一窩一窟
一窟情思長流水，水流長在心肝窟
一窟思親擔竿長，一廿長在天背遠
子哀成影，影成線
越夜……牽越長
緬緬無縷線⁴

¹含水過冬 ham[˥] sui[˥] go dung[˧]: 喻忍受困境度過難關。

²掖麻掖米 ie ma[˥] ie mi[˥]: 形容數量很多。

³鹹纖 ham[˥] xiam[˧]: 略帶鹹味。

⁴縷線 ngiung xien: 寬鬆。